

فريق التفريغ بموقع الطريق إلى الله

يقدم

من سلسلة "رمضان قَرَب يلاً نَقَرَب (4) عودة الروح"

الصلاة قُرْبُ ومناجاة

(باللهجة المصرية)



لفضيلة الشيخ: د. محمد جلال، والشيخ علي زيادة

رابط المادة: <http://way2allah.com/khotab-item-141562.htm>

السلام عليكم ورحمة الله وبركاته

أهلاً وسهلاً بكم يا جماعة في البرنامج الرائع المميز برنامج رمضان قرب يلا نقرب، بقالنا أربع سنين بنقول رمضان قرب يلا نقرب، ومكتملين إن شاء الله، مش هنزهق أبداً إن احنا نقول "رمضان قَرَب"، ومش هنزهق أبداً إن احنا نقول لكم "يلاً نقرب"، يلا نقرب بجد، يلا نقرب من ربنا - سبحانه وتعالى -، يلا نقرب بقلوبنا النهارده في حلقة رائعة إن شاء الله، يا رب تفيدكم ونقدر نفيدكم فيها، معانا فيها يعني ضيف عزيز علينا وحبيب قلبي وأخويا وأهل القرآن شيخنا المهندس علي زيادة، منورنا يا شيخنا.

الشيخ علي زيادة: تسلم، الله يحفظك وينور قلبك بالإيمان يا رب.

د. محمد جلال: النهارده يا جماعة إن شاء الله هنتكلم عن معنى حاجة هي من أهم الحاجات بل هي أول حاجة هتسأل عنها يوم القيامة، إن شاء الله يا جماعة هنتكلم عن الصلاة، وانت يعني كل الناس دلوقتي اللي سمعنا أو اللي هتسمعنا بعد كده أول ما بيسمع كلمة الصلاة بييجي في قلبه حاجة معينة، فيه واحد هيجي في قلبه إن دي العبادة اللي مقصر فيها، وفيه واحد هيجي في قلبه إن دي أحب مكان يقابل فيه حبيبه ربنا - سبحانه وتعالى -، وفيه واحد هيجي في قلبه إن دي حاجة ثقيلة عليه ونفسه إن هو يتخلص منها، النهارده يا جماعة في الحلقة دي هدفنا الأساسي إن انت تطلع وتنقل من مرحلة "أرحنا منها" من الصلاة إلى مرحلة "أرحنا بها".

هدفنا النهارده إنك انت تحب الصلاة، إنك انت تستناها، إنك انت تخاف إن الصلاة تخلص، إنك انت دائماً بتستنى ميعاد الفرض اللي بعده علشان فعلاً قلبك مُعَلَّق بالصلاة، قلبك مُعَلَّق بالوقوف بين يدي الله - سبحانه وتعالى -، النهارده هنتكلم عن الصلاة، وعازينك تطلع من الحلقة دي لو ما كنتش بتصلي، ولو بتصلي ومابتحسش بحاجة تحسّ وتصلي بقلب وتحبّ فعلاً الصلاة، عندنا شوية حاجات كده لازم نسألها وأول سؤال لازم نسأله يا باشمهندس علي، دلوقتي يا باشمهندس أنا قلبي أبيض من جوّه وأنا عامل زي البتجنانية بالظبط كده، يعني أبيض من جوّه وقلبي أبيض وبحب الخير للناس وبعمل أعمال خير كتيرة جداً، بس عندي مشكلة واحدة صغيرة خالص هي إن أنا مابصليش.

الشيخ علي زيادة:

طيب ما شاء الله فعلاً دي مشكلة صغيرة خالص خالص! اسمحلي الأول أسألك يعني أقول لك مين اللي قال له إن قلبه أبيض؟ اللي بيعمل كده مين اللي قال له إن قلبه أبيض؟ دا كدا ربّما يكون عايش في الوهم، ليه؟ لأن حقيقة القلب أصلاً لو أبيض بتظهر الأعمال البيضاء، القلب الأبيض يظهر علطول العمل بتاعه، قال رسول الله -صلى الله عليه وسلم-: **"أَلَا وَإِنَّ فِي الْجَسَدِ مُضْغَةً: إِذَا صَلَحَتْ صَلَحَ الْجَسَدُ كُلُّهُ، وَإِذَا فَسَدَتْ فَسَدَ الْجَسَدُ كُلُّهُ، أَلَا وَهِيَ الْقَلْبُ"** صحيح البخاري. المضغة دي فعلاً انت بتقول أرّاي، أنا شايف إن الجسد بيُعتبر فاسد، تعمل أعمال خير

مهما تعمل، على فكرة مش مقيّم الأمور صح، مش مقدّرها صح خالص، ليه؟

لأنّ عندنا حاجة معينة الله -سبحانه وتعالى- يقول: **"قَدْ أَفْلَحَ الْمُؤْمِنُونَ"** المؤمنون: ١. الأساس أنّه قال أفلح المؤمنون. طيب مين هما يا رب؟ **"الَّذِينَ هُمْ فِي صَلَاتِهِمْ خَاشِعُونَ"** المؤمنون: ٢، انت من غير الصلاة أصلاً انت مش فالح، علشان تتفق على حاجة معينة، انت عارف بيقابنلي فعلاً كنت في معرض الكتاب وبعدين شاب قابنلي -انت عارف الشبهات الجديدة المتداولة دي-، الولد بيعمل مجهودات جميلة جداً جداً في الحقيقة ولكن مقصّر في الصلاة، ويقول لي طب انت ليه تقول لي إنّ أنا مابصليش إنّ كده يبقى غلط والأعمال بتاعتي الباقي تروح! طيب انت بتعمل أعمال خير ليه؟ تعال نسأل السؤال ده؛ انت بتعمل أعمال خير ليه؟ علشان تحشّ الجنة، طب ما هي البوابة الرئيسية أصلاً انت مش راضي تفتحها، ليه؟ لأنّ قال رسول الله -صلى الله عليه وسلم-: **"أَوَّلُ مَا يَحَاسَبُ بِهِ الْعَبْدُ يَوْمَ الْقِيَامَةِ الصَّلَاةَ"** صححه الألباني. أول ما يحاسب العبد عنه يوم القيامة ايه هو؟ هو الصلاة، فإذا صلحت خلاص هيصالح سائر العمل، وإذا فسدت فهيفسد سائر العمل، وبالتالي هو البوابة الرئيسيّة هو قافلها على نفسه.

طبعا البوابة الرئيسيّة عندنا نحن المسلمين هي الصلاة، طيب أصلاً الإسلام والإيمان بناية في قلبك، إنما انت هدّيت عمود قوي جداً جداً، العمود الأساسي، الصلاة عماد الدين، من أقامها أقام الدين، ومن هدمها هدم الدين، طيب النهارده هو هدم العمود الأساسي عنده.

دا فيه نقطة كمان بقى مهمة أوي، إنّ هو ايه؟ أنا بعمل للناس أعمال خير، أو أنا بحبّ للناس أعمال خير، إحنا هنا لازم نسأله: انت الأعمال الخير اللي بتحبّها للناس دي أهم أعمال الخير اللي تحبّها للناس إنّ الناس تكون بتصلي، هو انت لو عندك النهارده طفل واقف على سور بلكونه وهيّقع، انت كل تفكيرك هل ينفع آجي أقول: والله الولد ده أنا عايز أجيب له علية زيادي كويّسة؟ أنا عاوز الولد ده ياريت أجيب له لعبة حلوة علشان يبقى يلعب بيها! لا طبعا انت كده ماقيمتش الأمور صحّ خالص.

إنما الأمور هنا اللي مابصليش ده على خطر عظيم إحنا خايفين عليه، وبالتالي يجب إنّ هو يعدّل الأمور بتاعته ويعدّل تفكيره علشان يكون ماشي وفقاً لأحكام الدين، **"قُلْ إِنَّ صَلَاتِي وَنُسُكِي وَمَحْيَايَ"** حتى حياتي كلها كاملة، **"لِلَّهِ رَبِّ الْعَالَمِينَ"** الأنعام: ١٦٢.

"وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ" الذاريات: ٥٦. ده الأساس عندنا.

بارك الله فيك يا دكتور محمد، فعلاً دي شبهات كثير بتخلّي الشباب يبعدوا عن الصلاة للأسف، لأنّ عندنا كمان انت عارف حضرتك من الحاجات اللي سمعتها اللي هو ايه، أنا بعمل معاصي، طيب بتعمل معاصي انت شايف ايه بقي؟ أنا بعمل معاصي أصلي إزاي يا شيخ؟ ده نقول له ايه؟

د. محمد جلال:

هو طبعاً دي من أكثر الشُّبُهَات اللي مضيعة معظم الناس اللي مابتصليش، هو أوّل حاجة: ومين قال لك إنّ إحنا ما بنعملش معاصي؟ ما هو أصلاً من صفات الإنسان المتلازمة معاه، النبي -عليه الصلاة والسلام- قال: "كلُّ بني آدمَ خطّاءٌ.."، "كلُّ" يعني مفيش حدّ، شيخ المشايخ "كل بني آدم خطّاء"، ولكن "وخيّر الخطّائين التّوّابون" حسنه الألباني. الناس اللي بنتوب، فمفيش حدّ أصلاً بلا معصية، يعني لو كل واحد عنده معصية قرّر إنّ هو مش هيصلي يبقى إنّ شاء الله مفيش حدّ هيصلي خالص، فدي رقم واحد، إنّ مافيش حاجة اسمها ما عنديش معاصي، انت لو ما عندكش معاصي يبقى فيه حاجة مش طبيعيّة، فيه معاصي ولكن فيه معاصي بنتوب منها.

الحاجة التّانية والخطيرة: طب أنا عندي معصية وعندي صلاة، أسيب المعصية ولا أسيب الصلاة؟ الأسهل ايه؟ الأسهل إنّني أسيب الصّلاة، يعني واحد كان يقول لي أنا بحفظ قرآن وما بنعملش بيه، فأنا حاجة من الاتنين، يا أسيب القرآن، يا إنّما أعمل بالقرآن، علشان أعمل بالقرآن دي حاجه صعبة، لكن علشان أسيب القرآن دي سهلة جدّاً فطبعاً أختار السهل طبعاً، والنبي -صلى الله عليه وسلم- ماخيّر بين أمرين إلا اختار أيسرهما¹، ده الكلام بالأدلة، فهو يقول لك خلاص يعني أنا أصلي ولا أعمل معاصي؟ فلقى الأسهل لا خلاص أنا أعمل معاصي.

بعدين الشيطان بيحجي له، يقول له: بُصّ أصل انت لّمّا بتصلي وتعمل معاصي انت كدا منافق، خلاص؟ والمنافق دا فين؟ في الدرك الأسفل من النار، لكن اللي ما يوصلش ده بقي عاصي، ففين؟ دا على وشّ النار من فوق، فهو خلاص، أنا اقتنعت، يعني أنا شخصياً اقتنعت، تقول له والله تصدّق عندك حق أنا ايه اللي يخليني مع الناس دي!

ففعلاً إنّك انت بدل ما تسبب الصلاة صلّ، يعني سيب المعصية، مش قادر تسبب المعصية ما تسبب الصلاة، يعني دا الأساس أصلاً.

الحاجة بقي الخطيرة برضه والمهمة جدّاً إنّك انت لا تترك باب مغلق بينك وبين الله -سبحانه وتعالى-، كان فيه أثر جميل جدّاً، طبعاً الأثر ده بحثت عن أصله يعني فتقريباً ما لقيتهوش، لكن معناه صحيح ومنتشر وهو معناه جميل جدّاً، إنّ هو رجل كان عالم وماشي في مكان وخرج عليه مجموعة من اللصوص وسرقوا الفلوس اللي معاه، وسرقوا الأكل بتاعه، وسرقوا كل حاجة، وبعدين وهو قاعد في وسط اللصوص بعد ما سرقوا حاجته فقاعدين شوية الحراميّة

¹ "ما خيّر رسول الله صلى الله عليه وسلم بين أمرين إلا أخذ أيسرهما ما لم يكن إثماً.." صحيح البخاري.

دول بياكلوا، فلقى الكبير بتاعهم زعيم العصابة مايبأكلش، فيقول له: انت ما بتأكلش ليه؟ قال له: أصل أنا صايم، قال له: صايم! دا انت سارق الأكل بتاعي، وسارق فلوسي، وسارق كل حاجه، وصايم؟! فقال له إيه؟ إني أترك بابًا بيني وبين الله، بعد خمس سنين الراجل ده وهو عند الكعبة بيطوف لقي رجل عمّال بيطوف ويبكي بكاء شديد جدًّا، بيصّ لقا مين؟ لقا زعيم العصابة، فقال له: ما الذي جاء بك إلى هنا؟ فقال: دخلتُ من الباب المفتوح، لأنّ هو سايب فيه باب بينه وبين ربنا، إنّ هو لَمَّا يحبّ يرجع يعرف يرجع، لَمَّا يسيب فيه حاجة بينه وبين ربنا - سبحانه وتعالى - يرجع منها.

الشيخ علي زيادة: الصلاة يا دكتور هي الباب ده؟

د. محمد جلال:

الصلاة أكبر باب طبعًا، دا الصلاة دي هي الصلّة، يعني الصلّة بينك وبين ربنا - سبحانه وتعالى -، يعني لو واحد صلّته اتقطعت بأصحابه هيحسن بمشكلة، لو فيه واحد صلّته اتقطعت بأبوه وأمه هيحسن بأزمة كبيرة جدًّا، والله المثل الأعلى، لو انت صلّتك اتقطعت بالله إيه أكبر خسارة ممكن تخسرها بعد كده؟ انت عامل زَيّ المريض بتاع العناية المركزة كده اللي محطوط بقى محطوط له محاليل ومتعلّق له أدوية، ومحطوط على تنفّس صناعي فينتوليتير ولا أيّ حاجة، الراجل ده في أيّ لحظة لو شلت عنه كل ده هيموت في ثانية.

والله المثل الأعلى، الإنسان في الدنيا عامل كده، عامل زَيّ مريض العناية المُركّزة اللي مترتّب ومحطوط عليه كل الأجهزة دي، وانت يعني عايش بعناية الله - سبحانه وتعالى -، انت محتاج ربنا في كل نفس في حياتك، محتاج ربنا في كل لحظة في حياتك، محتاج ربنا في كل خطوة وفي كل دقّة قلب، وفي كل حاجة، فماينفّش تقطع صلّتك برّبنا - سبحانه وتعالى -، ولازم تترك هذا الباب مفتوح.

ولكن يبقى عندنا بقى ايه؟ يعني شُبّهة كده منتشرة جدًّا اليومين دول، حدّ يقول لك والله أنا بقى عايز أصليّ، بس بقى مثلاً أنا واحدة مثلاً لابسة لبس ضيق شوية ومش معايا حجاب، فمش مشكلة أمّا أروح أبقى أصليّ الخمس صلوات على بعض ولا حاجة، واحد يقول لك أصل أنا عندي البنطلون مقطوع من فوق الركبة كده فطبعًا العورة باينة فمش هينفع أصليّ فإن شاء الله لَمَّا أروح أبقى أصليّ الصلوات دي، أو لابس تي شيرت قصير، أو أيّا كان الشُبّهة، والظروف مش مُهيأة إنّي أصليّ أعمل ايه؟

الشيخ علي زيادة:

والله يا دكتور السؤال ده لسه الموقف ده لسه حاصل معايا مع برضه واحدة، ويتشتغل في مكان وكده، ومابتصلّيش، فتسألني بقى السؤال: لو سمحت يا شيخ أنا مابصلّيش، ليه؟ علشان اللبس بتاعي ضيق وعلشان إنّ يعني صعب إنّ انا أتوضّي، وصعب إنّ أنا الحاجات اللي أنا حطّأها أصليّ بيها إزاي وكده! هنا فيه حاجة معيّنة نقطة مهمّة جدًّا

جدًّا لازم نقول للشباب عليها، طالما الصلاة أصلاً أصبحت عندك في حياتك هي مبدأ هام جدًّا جدًّا فانت بتفصّل حياتك كلّها عليها، اللي بتختار في لبسها فعلاً، أنا مسلم أنا بصليّ فأنا وأنا بختار اللبس بتاعي، أنا بختار اللبس اللي يوافق صلاتي، مش العكس، إطلاقاً، أنا أختار اللبس وبعدين اللبس مش نافع للصلاة طب أعمل ايه؟ طب أوّجّل الصلاة؟ لأ مابتعملش كده، انت ابن علي الصلّاة، أنا كده وأنا واقفة بشتري العبايات، العباية دي أنا بصليّ خمس مرّات على الأقل، بصليّ خمس مرات، طيب أنا العباية دي مناسبة للصلاة فيها ولا لا؟ أنا اللبس ده مناسب للصلاة فيه ولا لا؟

دا حتى يعني مع الشباب، شُفت حدّ كده، وكان حريص كان بيختار شوز وبعدين قال: لا، الرباط الكبير ده بيعطّلي، لأنّ هو عامل حسابه إنّه بيدخل المسجد خمس مرات، بيخلع الحذاء، ويدخل المسجد، ويخرج يلبس تاني، هو خمس مرات.

فهنا اللي بيفصّل حياته أصلاً على الدين والصلاة عنده منهج حياة وطريقة كاملة هو عايش بيها، فهو ده فصّل حياته، بالظبط يا جماعة عاملة زيّ ايه؟ احنا بنفرش الشقّة بتاعتنا، ربنا يسعد شباب المسلمين وبناتهم يا ربّ العالمين، بنفرش الشقّة عملنا حساب المطبخ، عملنا حساب الصالون، عملنا حساب الأنتريه، فين المكان اللي هتصلي فيه؟ ده شيء أساسي عندنا يا جماعة احنا مسلمين، ده الأساس بتاعنا.

شوف لو أنّ الله -سبحانه وتعالى- افترض علينا الصلاة خمسين صلاة فالمفروض لو انت شغّال بيهم انت عندك خمسين واجب لازم تقوم بيه باستمرار وماتسيبهوش خالص. ده بيجرّنا برضه طبعاً لحاجات تانية، اللي هو شوف اسمع الشبهة دي بقى؛ أنا بصليّ بس مش حاسس بالصلّاة، طب وبعدين؟ مش عارف أستمتع بقى، يعني أنا بصليّ ومش حاسس بالصلاة، فمش هصليّ، طالما مش حاسس خلاص.

د. محمد جلال: تحسّ إنّ دائماً الاختيار الأسهل: طب والله ما انا مصليّ.

الشيخ علي زيادة: دا نقوله ايه يا دكتور؟

د. محمد جلال:

مش لازم تحسّ يعني، مش مهم، طبعاً مش مش مهم، طبعاً الصلاة مهم جدًّا إنّك تحسّ، الصلاة محتاجة قلب فعلاً، النبي -صلى الله عليه وسلم- قال في السبعة الذين يظلمهم الله في ظلّه يوم لا ظلّ إلاّ ظلّه -سبحانه وتعالى-، قال: "ورجل قلبه مُعلّق في المساجد" صحيح البخاري ومسلم. كان الكلام هنا على القلب، قال لك القلب المُعلّق، يعني يقول لك زيّ النجفة اللي في المسجد كده، هي متعلّقة في المسجد، مكانها هنا، مابتخرجش من

هنا، فهو لَمَّا بِيَرُوحِ البيت هو بلا قلب، هو ماشي في الدنيا بلا قلب فعلاً، أنا قلبي هناك في المسجد مُنْتَظِر الصلاة اللي بعدها، ليه؟ أصل أنا قلبي هناك.

الشيخ علي زيادة: استنى يا دكتور، انت ادّيت مثال رائع، يعني فعلاً بيسيب قلبه وبيعلقه في المسجد، ويخرج شوية للدنيا ويرجع تاني لقلبه اللي كان معلقه، الله أكبر.

د. محمد جلال:

فقلبه ما بيتلوتش بالدنيا أصلاً، هو قلبه لا يتعلق بالدنيا لِآتِه مش معاه وهو في الدنيا، يعني فيه ايه رجل قلبه مُعَلَّق بالمسجد، فيه رجل قلبه مُعَلَّق بالملاعب، وفيه رجل قلبه..، يعني والله بتشوف مثلاً الشباب في موضوع الكورة إنَّ هو مُعَلَّق بالماتش اللي جاي، عمّال كل شوية ايه يبُصّ على الخريطة بتاعت مواعيد الماتشات، هو الماتش اللي جاي بتاع فلان امتى؟ آه دا لسه له يومين، وقاعد مستنيّ اليومين، طب ماتش النادي الفلاني امتى؟ مُعَلَّق فعلاً، دايمًا مستنيّ الميعاد، مستنيّ، مُتَشَوِّق ليه، وكل شوية: هو كاس العالم لسه عليه قَدَّ ايه، مش عارف ايه، ليه؟ بيحبّه فعلاً، اللي قلبه مُعَلَّق بالمسجد، مستنيّ، هو لسه الصلاة اللي جاية امتى؟ ليه؟ قلبه مُعَلَّق.

فهنا النبي -صلى الله عليه وسلم- كان بيتكلم على القلب، كان شُفّت فيديو كده قبل ما آجي النهارده، فيديو قديم ومشهور بس جميل أوى، رجل أعمى وهو عايز يصلي في المسجد فرباط بين المسجد وبين البيت جبل، وساعة الصلاة يمشي مع الجبل، الفيديو موجود يعني، فحاجة جميلة أوى، تحسّ إنَّ هو ايه؟ لأ أنا عايز أصلي.

كنت عامل في مرة كده عمليّة في ركبتي كده في مرة فمأكنتش بعرف أسجد، فساعتها حسيت إنَّ السجود حلو أوى، حسيت بجمال السجود لَمَّا حسيت إنَّ أنا مش عارف أسجد.

وربنا -سبحانه وتعالى- قال: **"وَاسْجُدْ وَاقْتَرِبْ"** العلق: ١٩. كنت دايمًا إيه؟ لَمَّا نيحي داخلين المسجد نصلي فتلاقي مثلاً الإمام ساجد، فاللي بيحصل إنَّ الناس بتعمل إيه؟ بيقف يستنى لحدّ ما الإمام يقف ويقف معاه، يقول لك لسه هنزل وأطلع وبتاع، فكل ما أخشّ في الوقت دا وأقول أستنى أفتكر الآية بتاعة **"وَاسْجُدْ وَاقْتَرِبْ"** أقول لأ السجدة دي اللي أنا هسيبها دي، دي هتقرّب، يعني دي هتقرّبني من ربنا -سبحانه وتعالى-، فأسجدها، انت واخذ بالك؟ يعني انت عارف لو دخلت لقيتهم في التّشهُد ممكن أكسل مثلاً : (لكن في السجدة بالذات هستشعر المعنى دا.

"وَأَقْرَبُ مَا يَكُونُ الْعَبْدُ مِنْ رَبِّهِ، وَهُوَ سَاجِدٌ" صحيح مسلم. يعني -ولله المثل الأعلى- لَمَّا أنا أقول لك إنَّ فيه حدّ انت بتحبّه أقرب مكان له هو المكان الفلاني، هتبقى حريص جدًّا إنك تبقى في المكان دا، تخيلت النهارده نفسي إنَّ أنا أوّل مرة بسمع حديث النبي -صلى الله عليه وسلم- دا اللي هو "أقرب ما يكون العبد إلى ربّه.."، وراح النبي ساكت، فأنا إيه دا؟ إيه أقرب مكان ممكن أبقى قريب فيه من ربنا؟

الشيخ علي زيادة:

نفسى أعرف الإجابة، ومُنتظر..

د. محمد جلال: يعني إيه دا؟ يعني أقرب ما يكون، إيه دا؟ طب فين المكان دا؟ أطلع على جبل مثلاً؟ أقرب ما يكون العبد إلى ربه فين المكان دا علشان أسافر له وأدفع فلوس كثير جداً علشان أروحه، واخذ بالك؟ دا وهو ساجد، دا مكانك كدا بس بينك وبين الأرض مفيش ثلاثين أربعين سنتيمتر بس اسجد.

فهو رقم واحد: لأ أنت محتاج قلب، محتاج قلب فعلاً.

رقم اتنين - ودي اللي قُلْتها من شوية -: إنَّ فعلاً مش لازم تحس، يعني إيه؟ يعني إيه مش لازم تحس؟ يعني لو انت مش حاسس بحاجة صلِّ برضه، لو انت مش حاسس بأي حاجة برضه صلِّ.

الشيخ علي زيادة: المعنى دا مهم نركّز عليه جداً يا دكتور، يعني في كل أحوالك انت ما عندكش بديل.

د. محمد جلال: آه، لأنّ دي عبودية لله - سبحانه وتعالى -، انت عبد، العبد ما يتشرّطش، أهم حاجة اعملها - ودا اللي في إيدك - ركّز بس في الكلام اللي انت بتقوله، يعني بتقول "الْحَمْدُ لِلَّهِ رَبِّ الْعَالَمِينَ" تبقى فاهم انت بتقول إيه، بتقول "الله أكبر" فاهم انت بتقول إيه، افهم بس، مش لازم بقى تشعر بالمعاني الفظيعة بقى وشعرت وكأنّ الكعبة أمامي والجنة عن يميني والنار عن يساري.. دي مراحل متقدمة مش لازم تبدأ بها علشان ما تتعقدش، مش حاسسها يكفي إنك تبقى فاهم انت بتقول إيه، ودي عبودية لله - سبحانه وتعالى -، ما تتشرّطش على ربنا، صلِّ لأنك عبد ولو ما صلّيتش هتتعذب.

وزيّ ما حضرتك كنت بتقول دلوقت هما كانوا خمسين صلاة قبل كده، يعني على أربعة وعشرين ساعة يعني كل نُصّ ساعة مطلوب منك صلاة، ولو ما صلّيتش هتتعذب وهتترمي في جهنم، وخمسين فَرَض، يعني انت مثلاً بتننام الساعة ١٢ بالليل بتصحى ٦ مثلاً أو ٥ الفجر، عندك صلاة ١٢ ونصّ، وصلاة الساعة واحدة، وصلاة واحدة ونصّ، وصلاة اتنين، وصلاة اتنين ونصّ، وصلاة ثلاثة، وصلاة ثلاثة ونصّ، يعني كل نُصّ ساعة صلاة، مفيش أصلاً مصلحة هتعمل، طول ما انت في الشغل بتخلّص الصلاة بترجع شغلك علشان ترجع تصلّي الصلاة اللي بعدها، فهّم بقوا خمس صلوات بخمسين صلاة..

الشيخ علي زيادة: رحمة كبيرة جداً فعلاً من ربنا سبحانه وتعالى.

د. محمد جلال: يبقى رقم واحد: آه محتاجين قلب.

رقم اتنين: حتى لو ما حسيتش، انتظّم في الصلّاة.

رقم ثلاثة بقى: الخطوات العملية:

زَيِّ ما قلنا أول خطوة عملية: اعرف معنى اللي بتقوله، ودي بسيطة خالص؛ "الحمد" انت فاهم يعني ايه حمد، "رب العالمين" انت فاهم يعني ايه رب العالمين، خلاص؟

رقم اثنين: استعد دايماً من الشيطان، وإن كَلَّ ما الشيطان يبجي تستعيد من الشيطان وتنفل عن يسارك.

رقم ثلاثة بقى: اللي هي المعاني العالية اللي احنا بتتكلم عنها.

فممكن بعد الكلام الكثير دا واحد يقول لك يا عمّ بُصّ هاتلي من الآخر، أنا عايز الرّتونة، أنا عايز الكلام العملي، أنا يا عمّ اقتسعت بكلامك زَيِّ الفلّ، قُل لي أعمل إيه عدشان أصلي، عايز أصلي، قُل لنا بقى يا شيخ علي.

الشيخ علي زيادة:

ما شاء الله، دا فعلاً شيء طيب جداً جداً، اللي وصل للمرحلة دي وقال أعمل إيه، وأنا عاوز أصلي، دا فعلاً خلاص دا واحد بدأ يقرب، دا واحد بدأ يحسن بالموضوع، وبداي يقرب، طبعاً أكيد فيه خطوات؛ واحد اتنين ثلاثة أربعة؛ لأن الله -سبحانه وتعالى- يا جماعة "مَا فَرَطْنَا فِي الْكِتَابِ مِنْ شَيْءٍ" الأنعام: ٣٨، وربنا -سبحانه وتعالى- علمنا كَلَّ حاجة، علمنا كيف نتعبد إليه، عرفنا ازاي نسير في الطريق إلى الله -سبحانه وتعالى-.

فأنا أرى أول خطوة إن انت عاوز تصلي وعاوز تقيم الصلاة ابدأ بقى كلم ربنا -سبحانه وتعالى- وناجي ربنا -سبحانه وتعالى- وادعي ربنا واستعين بيه، علطول انت عارف كده قول النبي -صلى الله عليه وسلم-: "اللَّهُمَّ اهْدِنِي فِيمَنْ هَدَيْتَ" صحيح ابن حبان.

انت بادئ تطلب يا رب ائذن لي إني أقف بين ايديك، وأنا لَمَّا أكلمك عن الدعاء والاستعانة بالله -سبحانه وتعالى- خلونا نكلم الطائفة البسيطة العامة من الشباب اللي هو إيه؟ اللي هو فعلاً يقول يا رب، بيكلم ربنا ببساطة، قُل: يا رب أنا حبيتك، أنا عرفت يا رب إن الصلاة دي شيء مهم جداً ولازم إن أنا أصلي، وخايف من عذابك لآني علمت إنك بتعذب اللي ما بيصليش، أنا يا رب خايف، طيب اللهم حبب إلي الإيمان وزينه في قلبي، اللهم ائذن لي بالصلاة بين يديك، اللهم ائذن لي بالوقوف بين يديك، اللهم حبب إلي الصلاة، يعني النبي -صلى الله عليه وسلم- ظل يدعو الله -سبحانه وتعالى- ويستعين بالله -سبحانه وتعالى- حتى جعل الله الصلاة قُرّة عين النبي، بيحب الصلاة، النبي -صلى الله عليه وسلم- بيحب الصلاة.

عارف لَمَّا يحصل كده وتفضل انت تطلب من الله -سبحانه وتعالى- هتصل لمعنى جميل جداً هتلاقي إن ربنا بيهديك لكل حاجة صلاة، في العيد بنصلي، في الجنائز هتصلي، في كسوف الشمس هتصلي، في خسوف القمر هتصلي، في كل الأحوال، أذنبت ذنب هتروح تصلي، وتجري على الصلاة، خلاص ربنا -سبحانه وتعالى- حببها إليك، وألقى بحب الصلاة في قلبك، وانت حسيت خلاص إن انت ما تقدرش تسيبها ولا تبعد عنها، دا هيكون

بفضل إيه؟ بفضل -ركّز معايا- النقطة الأولانية الدعاء والاستعانة بالله وإنّ الله -سبحانه وتعالى- يشوف في قلبك يرى في قلبك كده مدى حبك وحرصك على الصلّاة فيوقفك إن شاء الله ربّ العالمين.

إيه تاني حضرتك شايف ممكن نضيفها للشباب دا؟

د. محمد جلال:

بُصّ يا شيخنا من أهم الحاجات فعلاً بعد الدعاء مسألة إنك انت تُعظّم الصلاة كما تُعظّم الأمر بالصلاة، يعني زيّ ما بنقول في المعصية: لا تنظر إلى صغر المعصية ولكن انظر إلى عظم من عصيت، فكذلك في الصلاة؛ انظر إلى عظم من أمرك بالصلاة، لو أنا واحد صاحبي رنّ عليّ علشان أنزل له، لو أنا بحبّه هنزل، طب ما الله سبحانه وتعالى، والله المثل الأعلى، كمّا بيعث إليك بنداء "حيّ على الصلاة" تعال صلّ، على قدر الحبّ اللي في قلبك هتروح، لو انت بتُعظّم الله -سبحانه وتعالى- قدر تعظيم الله في قلبك هتروح.

فمهم جداً جداً إنك تكون بتُعظّم الأمر دا، إنّ الصلاة من عدمها مش أوبشن في حياتي، مش هي أصلي ولا ما أصليش، مفيش حاجة اسمها أصلي ولا ما أصليش، لازم تصلي.

الشيخ علي زيادة: مفيش بديل عن الصلاة يا دكتور؟!

د. محمد جلال:

مفيش بديل يا شيخنا، لازم تصلي، وصلّ في معاد الصلاة، يعني كل ما بتصلي الصلاة في ميعادها كل ما تبقى أسهل، يعني بعض الناس يقولك تقعد تأخر الظهر لحد قرب العصر وفي الآخر صلّته أربع ركعات برضه، يعني ما نزلش عليه سيل مثلاً فصلّته ركعتين، لا، هو اتصلي أربع برضه، طب ما تصليه أربعة من الأول، خلاص؟ المغرب بيتساب لحد قرب العشاء وبرضه بتصلي ثلاثة، العشا اتسابت لحد بالليل وقائمة تصليها بالعافية وبرضه اتصلت أربعة، طب ما تصلي في ميعاها، فتعظيم الصلّاة، وإنّ دا جزء من حياتي، إنّ أنا جزء من حياتي إنّ أنا أصلي، جزء من حياتي دا يعني كنت أنا مثلاً إيه فيه مثلاً الواحد لازم جزء من حياته إنّ بيروح الشغل، عدم مرواح الشغل دا ليس أوبشن في الحياة، مفيش حاجة اسمها كده، هتروا ومش هلاقي آكل، فلازم نمت بقى بدري، نمت متأخر، تعبان، قرفان، مش طابق اللي شغالين معايا.. في الآخر هروح برضه الشغل، هصحي بالعافية، واخذ بالك؟

فلما أكون أنا الصلاة في حياتي كده، أصلي مفيش حاجة اسمها أصل أنا مش هصلي النهارده، مفيش حاجة اسمها كده، تعبان، مش قادر، بتموت خلاص، بتعمل أي حاجة، لازم تصلي، قاتل المائة وهو بيموت "فنأى بصدرة"، يعني قعد يزحف علشان يوصل الأرض الصالحة، إنّ لحد آخر لحظة في حياته بيحاول، بيحاول إنّ هو يوصل. فدي نقطة من أهم النقاط في مسألة الصلاة.

فبعض الناس يقولوا طب إيه؟ ممكن الواحد يعمل جدول محاسبة نفس، فإيه رأيك في موضوع الجدول دا؟

الشيخ علي زيادة:

موافق جداً، على فكرة تعالٍ نتكلم في الصلاة، ونتكلم فيها كنظام بيزنس، انت عندك مواعيد معروفة وعندك جدول معروف، زيّ أيّ مكان انت عندك مهام واحد اثنين ثلاثة أربعة، كل ما تطبق المهام بتاعتك كل ما بتيجي تقيم نفسك في آخر اليوم انت قُمت بالمهام بتاعتك ولا لأ، ففعلاً عطلول جدول، إيه المشكلة؟ جدول؛ الفجر، الظهر، العصر، المغرب، العشاء، السُنن، أنا صليت إيه وما صليت إيه، يبقى شايف لأنّ الإنسان أصلاً بينسى يا دكتور، يعني المشكلة يا جماعة إنّ الإنسان بينسى، إنّما سُمّي "الإنسان" من كثرة النسيان، فعلشان ما تنساش تبقى فاكّر انت ماشي ازّاي.

وخدوا بالكم العنصر اللي بتتكلم فيه إيه؟ العنصر اللي بتتكلم فيه إنّ واحد خلاص إيه الحاجات اللي تعينني علشان أحافظ على الصلاة، أنا اقتنعت وفهمت وعاوز أكمل الحاجات دي، إيه الحاجات دي بقي؟ خلاص آه فعلاً انت ماشي بتسايس نفسك بالراحة، الفجر والله عملت صح، طيب فيه حاجة كمان عاوز تدي لنفسك هدية تعمل أيّ حاجة كويسة حاجة زيّ كده جميل جداً جداً، صليت السنن أعمل كده، فيه فرض بعد كده اتأخّر أو وقع مني طبعاً المفروض مفيش حاجة تقع، احنا خلاص أسسنا في الحلقة دي إنّ الأوبشن دا مش موجود أصلاً، إنّما لا قدر الله فيه فرض وقع مني أنا شايفه وشايل همّه وأبدأ ألوم نفسي وأعاتب نفسي عليه، يبقى فعلاً كون جدول موجود بالسُنن، جدول موجود بالمحافظة على الوضوء، بالصلاة ومشمولاتها، أنا أحافظ عليه.

دكتور لو أنا عامل حسابي إنّ عندي صلاة بعد ثلاث ساعات، أنا برکز في المكان اللي أنا فيه، برکز في اللبس اللي أنا لابسه، برکز في كل حاجة وبجهّز نفسي له، وبأهّب نفسي له، القصة بتيجي إنّ الصلاة بتروح لأنّ انت مش فاكرها أصلاً ومش مأهّب نفسك لها، انت قاعد تشتغل، والشغل واخذك، وطالما الشغل واخذك، أنا قاعد مع الشغل، طب هتصلي امتي؟ لَمّا أخلّص شُغل، لأ مفيش كده، أنا هصلي الساعة ١٢، يعني أنت هتصلي الظهر امتي؟ أنا بصلي الظهر الساعة ١٢، ليه؟ لأنّ هو ميعاده ١٢ وأنا عندي جدول مطبّطه مع نفسي ١٢، وماشي بناءً على كده، وبحاسب نفسي حساب شديد إنّ الصلاة يا جماعة جنة ونار.

د. محمد جلال: حياته بتقف عشان يصلي، زيّ ما بيوقف حياته عشان يخش الحمام، بتقف، لازم يخش دلوقتي، خلاص وقّف، روح صلّ دلوقتي.

نعمل مثلاً الجدول مع بعض، نعمل كل حاجة مع بعض، وطبعاً الكلام دا شباب مع شباب، مش ولد مع بنت، وأنا بصحّيها للفجر وهي بتصحيني..

الشيخ علي زيادة: شوف التقوى، يظهر هنا الوقت ده التقوى والإيمان والورع، خايف عليها، وهو ما كانش خايف على نفسه أصلاً يعني.

د. محمد جلال: طيب قبل ما نختم كده يا شيخنا، يعني الوقت عدّى بسرعة في كلامنا عن الصلاة فلو حضرتك تدعي لنا دعوتين حلوين كده، قبل ما نختم إن شاء الله.

الشيخ علي زيادة:

تحت أمر حضرتك.

اللهم لك الحمد أنت نور السماوات والأرض ومن فيهنّ، ولك الحمد أنت قيوم السماوات والأرض ومن فيهنّ، اللهم اجعلنا مقيمين الصلاة، اللهم حبّب إلينا الصلاة، اللهم أعنّا على الصلاة، اللهم أيقظنا لصلاة الفجر، اللهم أيقظنا في الليل للوقوف بين يديك، اللهم اجعل قرّة أعيننا في الصلاة، اللهم لا تحرمنا الصلاة أبداً، اللهم متّعنا بالصلاة ما أحييتنا، اللهم اجعل الصلاة منهاج حياتنا، اللهم اجعلها نوراً لنا يا ربّ العالمين، اللهم لا تحرمنا الصلاة، اللهم خذ بنواصي الشباب والبنات إلى الصلاة يا ربّ العالمين، وخذ بقلوبهم إلى المساجد برحمتك يا أرحم الراحمين، وصلى اللهم على محمد بن عبد الله، وآخر دعوانا أن الحمد لله ربّ العالمين.

د. محمد جلال:

جزاك الله خيراً شيخنا، كنا يا جماعة النهارده يعني نتمنى إن شاء الله ونرجو من الله - سبحانه وتعالى - إن احنا مش مجرد إن احنا أثّرنا فيكم بس، احنا عايزينكم مش تتأثروا، احنا عايزينكم تتغيروا، ممكن يبقوا الثلاثين دقيقة دول إن شاء الله سبب في تغيير حياتك، اتعود إنك انت هتتغير، ماتقلش مفيش أمل، ماتقلش مفيش فائدة، لا إن شاء الله مفيش مستحيل مع الله - سبحانه وتعالى -، مفيش أي حاجة تعوقك عن القرب من ربنا - سبحانه وتعالى -، مفيش أي حاجة تمنعك إنك انت تحافظ على الصلاة، الصلاة أول ما يُحاسب عليه المرء يوم القيامة، الصلاة هي أول حاجة بعد الشهادتين، الصلاة هي آخر كلمة تكلم بها النبي - صلى الله عليه وسلم - كما قال: "الصلاة الصلاة وما ملكت أيمانكم" مسند الإمام أحمد بن حنبل. الصلاة كان آخر حاجة النبي - صلى الله عليه وسلم - اهتم إن هو يسأل عليها لَمَّا كان يقول: "أصلّي النَّاس؟" صحيح البخاري. فيا ربّ يا ربّ كُنَّا نتغير إن شاء الله بعد الحلقة دي، ونصلي صلاة صحيحة.

جزاكم الله خيراً. والسلام عليكم ورحمة الله وبركاته.

تم بحمد الله

شاهدوا الدرس للنشر على النت في قسم تفرغ الدروس في منتديات الطريق إلى الله وتفضلوا هنا:

<http://forums.way2allah.com/forumdisplay.php?f=36>